



LE GOUVERNEMENT
DU GRAND-DUCHÉ DE LUXEMBOURG
Ministère de la Santé
et de la Sécurité sociale

Äntwert vun der Madamm Ministesch fir Gesondheet a sozial Sécherheet op d'parlamentaresch Fro n° 3054 vum 16. Oktober 2025 vum honorabelen Deputéierten Här Sven Clement.

1. Wat ass genee mat den Diskussiounen mat de betreffenen Acteuren geschitt, déi am Abrëll 2023 versprach goufen? Hunn dës Diskussiounen stattfonnt? Wann d'Diskussiounen stattfonnt hunn, wat waren d'Conclusiounen a firwat sinn d'Forfaiten deemools net geännert ginn?

2. Ass geplangt, dës Forfaiten an de nächste Joren ze erhéijen? Wa jo, fir wéini ass dës geplangt? Wa nee, firwat net?

3. Ass geplangt, fir d'Forfaite fir den Aidant informell an Zukunft ze indexéieren? Wa jo, wéini soll dat geännert ginn? Wa nee, firwat net?

Den "Aidant informell" gouf mat der Reform vun der Fleegeversécherung am Joer 2018 zum Aidant, deem zënterhier kloer definéiert ass an och vun der Administratioun fir d'Evaluatioun an d'Kontroll vun der Fleegeversécherung (AEC) evaluéiert gëtt. Dës ass wichteg fir d'Qualitéit vun de Leeschtungen, déi den Aidant muss erbréngen och ze assuréieren. Dës gesetzlech Upassung goufen och duerch zousätzlech Mesurë begleet déi den Aidant a senger Roll sollen ënnerstëtzen.

D'Leeschtungen vun der Fleegeversécherung stellen e Recht vun der fleegebedierfter Persoun duer. D'Geldleeschtungen déi als Forfait am Kader vun der Presenz vun engem Aidant ausbezuelte ginn (forfait pour prestations en espèces (PE)), ginn also un déi fleegebedierfte Persoun ausbezuelte an net un den Aidant.

D'Forfaite fir d'Geldleeschtungen goufe mam Gesetz vun 1999 agefouert a waren net als Revenu de remplacement geduecht. Den Artikel 354 seet an deem Sënn: «les prestations en nature pour les actes essentiels de la vie et pour les activités d'assistance à l'entretien du ménage fournies par l'aidant ... peuvent être remplacées par une prestation en espèces.»

D'Geldleeschtungen sinn also weder e Salaire nach e Revenu de remplacement fir den Aidant, mee et ass eng Leeschtung, déi de Beneficiaire vun der Fleegeversécherung krit, wann dës Beneficiaire en Aidant huet. Et ass eng Indemnitéit vun der Fleegeversécherung fir déi fleegebedierfte Persoun déi hier Versuergung Doheem organiséiert. Deementspreechend huet de Léislateur och am Artikel 354 weider virgesinn datt op dëser Indemnitéit weder charges sociales nach fiscales opzehiewe sinn. D'Gesetz gesäit och net vir datt des Indemnitéit am Laf vun der Zäit ugepasst gëtt.

D'Prioritéit an der Fleegeversécherung läit op de Sachleeschtungen an net op de Geldleeschtungen. D'Gesetz gesäit vir, dass een en Urecht op Saachleeschtungen huet, deem, ënnert verschiddene Conditioenen, bis e gewësse Plaffong kann an eng Geldleeschtung ëmgewandelt ginn.

Dowéinst ass net geplangt d'Forfaite vun de Geldleeschtungen an Zukunft ze indexéieren.



4. Wéi vill Leit kréien de Moment Geldleeschungen als Aidant informell, opgeschlësselt no den 10 Forfait-Niveauen?

Op den 31. Dezember 2024 hu 7 449 fleegebedierfteg Persounen aus Lëtzebuerg, déi doheem oder och just zäitweis doheem sinn an déi aner Zäit an engem Établissement d'aide et de soins à séjour intermittent (ESI) sinn, eng Synthèse de Prise en Charge déi een Aidant virgesäit.

Tableau 1 – Unzuel u fleegebedierfteg Persounen, déi zu Lëtzebuerg wunnen an assuréiert sinn um 31. Dezember 2024 a fir déi d'Synthèse en Aidant virgesäit, opgedeelt no Forfait PE

Forfait PE	Unzuel u fleegebedierfteg Persounen
1	194
2	210
3	601
4	514
5	433
6	384
7	909
8	894
9	637
10	2 673
Total	7 449

Quell: Datebank vun der sozialer Sécherheet, Berechnung IGSS.

Zousätzlech zu dëse Léit kréien awer och nach op den 31. Dezember 2024 1 459 fleegebedierfteg Persounen, déi am Ausland wunnen oder Urecht op Leeschtunge vun der Fleegeversécherung hunn am Kader vun den Dispositions particulières (cécité complète, de réduction grave de la capacité auditive, de troubles graves de la communication, les personnes atteintes de spina bifida, d'aphasie et les personnes présentant une laryngectomie), e Forfait PE ausbezuelet.

5. Wat wier de budgetären Impakt, wann dës Forfaiten ab 2025 indexéiert géife ginn?

2024 lounge d'Ausgabe fir d'Geldleeschungen à charge vun der Lëtzebuerger Fleegeversécherung, déi op Basis vun engem Forfait PE am Kader vun engem Aidant oder vun den Dispositions particulières ausbezuelet goufen, bei 75,9 Milliounen EUR, y inclus d'Geldleeschungen déi u Beneficiairen am Ausland iwwerwise goufen (8,7 Milliounen EUR).

Des 75,9 Milliounen EUR u Geldleeschungen déi am Kader vun engem net indexéierte Forfait am Joer 2024 ausbezuelet goufen, entspreche 7,5% vun de lafende Käsche vun der Fleegeversécherung am Joer 2024.¹

¹ Quell : Comptes annuels de l'assurance dépendance 2024 - CNS



Wann des Forfait'en op den 1. Januar 2024 em 2,5% gehéicht gi wieren, da wieren d'Ausgabe vun der Fleegeversécherung em 1,9 Milliounen EUR an d'Luucht gaangen.

6. Ëm wéi vill Prozent ass de reelle Wäert vun dëse Forfaiten zënter Januar 2018 duerch d'Inflatioun erofgaangen?

7. Erkennt d'Ministesch un, datt informell Aidanten effektiv eng bedeitend Reduktioun an hirer Entschiedegung iwwert déi lescht 7 Joer erliewen hunn?

D'Forfaite fir d'Geldleeschtinge sinn op engem net indexéierte Stonneloun vu 25 EUR pro Stonn berechent.

Um 1. August 2018 loung den Index bei 814,4. Déi lescht Indextranche koum den 1. Mee 2025, a säitdeem leit den Index bei 968,04. De reelle Wäert vun dëse Forfait'en ass also em 15,9% zënter den zwou Perioden erof gaangen.

D'PE war zanter der Aféierung vun der Fleegeversécherung plafonéiert aus verschiddenen Ursaachen, ënnert anerem fir ze verhënneren, dass en Aidant seng Aarbecht opgëtt fir een doheem ze fleeegen. Et soll och encouragéiert gi fir professionell Hëllef duerch e Fleegegedéngscht mat derbäi ze huelen, besonnesch a Fäll vu méi schwéier fleegebedierftege Persounen, fir eng Iwwerfuerderung vum Aidant ze verhënneren an och d'Qualitéit vun der Prise en Charge ze garantéieren. Et ass och esou dat déi grouss Majoritéit vun de Beneficiaire vun der Fleegeversécherung, déi doheem versuergt gi vun der Ënnerstëtzung vun engem Fleegegedéngscht profitéieren.

8. Wéi sinn déi Lëtzebuerger Geldleeschtinge fir informell Aidanten am Verglach mat deenen an de Nopeschlänner (Belsch, Frankräich, Däitschland)?

Vill Länner an Europa hu keng Fleegeversécherung oder ganz aner Systemer. Dowéinst ass de Lëtzebuerger System net direkt mat der Situatioun am Ausland vergläichbar. An Däitschland zum Beispill leien déi maximal Geldleeschtinge bei 947 Euro de Mount.

9. Huet d'Ministesch Donnéeën doriwwer, ob déi stagnéierend Entschiedegung zu engem Réckgang vun der Unzuel vun informellen Aidanten gefouert huet oder zu engem Wiessel en faveur vun engem professionelle Fleege-service?

En Objektiv vum Gesetz vun 2018 war et d'Qualitéit vun de Leeschtungen ze verbesseren. D'Evaluatioun vum Aidant soll sécherstellen dass den Aidant déi erfuerdert Leeschtungen erbrénge kann, an d'Preferenz fir eng Kombinatioun vun Aidant mat Réseau soll ënnert anerem dofir suergen, dass méi séier kann intervenéiert ginn, fir de Fall wou den Aidant sengen Ufuerderungen aus diverse Grënn net méi nokomme géing.



Wat déi fleegebedierfteg Persounen doheem ouni ESI mat enger Synthèse de prise en charge déi just een Aidant ouni Interventioun vun engem Réseau virgesäit betrëfft, ass d'Unzuel tëscht dem 31. Dezember 2018 an dem 31. Dezember 2024 vun 1 276 Persounen op 625 Persounen zeréck gaang.

Wat déi fleegebedierfteg Persounen doheem ouni ESI betrëfft déi eng Synthèse hunn déi ee Réseau an een Aidant virgesäit, ass d'Unzuel tëscht dem 31. Dezember 2018 an dem 31. Dezember 2024 vu 4 931 Persounen op 6 630 Persounen geklommen.

Insgesamt geet de Prozentsaz vun de Synthësen bei de fleegebedierftege Persounen doheem ouni ESI déi een Aidant mat oder ouni Interventioun vun engem Réseau virgesinn erof vu 77,4% um 31. Dezember 2018 op 67,8% um 31. Dezember 2024.

Et muss een oppasse bei der Interpretatioun vun dëser Baisse. Dëst well der IGSS zum Beispill keng Zuele virleien, a wei vill Fäll eng fleegebedierfteg Persoun doheem iwwerhaapt ee potentiellen Aidant zu Verfügung huet. Zousätzlech ass der IGSS och net bekannt a wei vill Fäll de potentiellen Aidant net zeréckbehal gouf, well en den Evaluatiounscritèren, déi mam Gesetz vun 2018 agefouert goufen, net entsprécht oder a wei vill Fäll potentiell Aidant'en sech decidéieren, als *informellen Aidant* der fleegebedierfteger Persoun zur Säit ze stoen ouni eng finanziell Géigeleschtung an dëst aus privaten oder professionnelle Grënn.

10. Wéi en Impakt huet déi feelend Upassung op d'Fäegkeet vu Familljen, fleegebedierfteg Persounen doheem ze halen?

Wéi scho méi Uewe beschriwwen läit d'Prioritéit an der Fleegeversécherung op de Sachleeschungen an net op de Geldleeschungen, schonn eleng fir d'Qualitéit vun der Prise en Charge ze garantéieren.

Et ass wichteg ze bemierken dat d'Fleegeversécherung weider Mesurë virgesäit, déi den Aidant entlaaschte falls den Aidant de Beneficiaire net kéint doheem halen. Dozou zielen zum Beispill den Aidant ze remplacéieren wann dëse krank ass oder Congé huet. Dee Moment iwwerhëlt de Fleegegedéngscht d'Hëllef-a Fleegeleeschungen. De Beneficiaire vun der Fleegeversécherung ka verschidde Garden an Usproch huelle wéi zum Beispill d'Garde individuel oder am Grupp (foyer de jour) oder d'Nuetswaach (10 Nuechte pro Joer). D'Bereetstelle vun techneschen Hëllefsmëttel oder eng Upassung vun der Wunneng iwwert d'Fleegeversécherung kennen och d'Aufgabe vun der Fleegepersoun vereinfachen an erliichteren. Donieft kann den Aidant och nach Formationen suivéieren fir d'Prise en Charge vum Beneficiaire besser ze garantéieren oder wéi een déi technesch Hëllefsmëttel ka benotzen. Fir den Aidant, deen nach net pensionéiert ass, kann d'Fleegeversécherung Cotisatiounen an d'Pensiounskeess (berechent op de soziale Mindestloun vum onqualifizéierte Salarié) abezuelen, fir esou engem kompletten Ausfall zum Deel entgéint ze wierken.

Lëtzebuerg, den 18. November 2025

D'Ministesch fir Gesondheet
a sozial Sécherheet

(s.) Martine Deprez